

封非已之所書云此不可謂無奸偽也刑訊雖重若以國試之大事觀之則特小事也大臣雖欲勿推國試不可輕忽窮訊畢堆可也○傳于政院曰大臣皆議曰臺諫之引嫌為當大司諫韓承貞司諫黃士祐正言宋純其並寤之○以李龜齡為司諫院大司諫權輓為司諫林鵬金致雲為正言○夜坤方有氣如火

六月辛丑朔傳曰今觀禁府所啓韓綰則固當刑推也但所推書吏皆似不干而唯成均館書吏池漢輔以收券官書吏隨入殿中韓綰以生員常往來館中則池漢輔固知綰之面貌而又曰當此事之始起而歸鄉此吏則可疑也書吏池漢輔正兵李騎駿外皆可放逐且物論皆以韓綰為疑綰之所答與禮曹義禁府所問時言前後不同而又曰誤落臣字挾書其傍予意亦疑其綰落書臣字欲自改書割之而忘却空封也○義禁府堂上洪淑孫仲敷金謹思啓曰臣等近日推問韓綰之事只疑綰不自書填別無他疑若實有忌綰而為之則豈特裂破皮封而還封耶臣等取其試券而考之皮封之割甚正而謹封亦從容書之豈他人之所為乎且同坐之人若有不肖者則如此之事容或有之臣等問其誰與同坐則曰同處之人皆不得入試故臣獨坐西階之下見一